

# INUIT ATAQATIGIIT INATSISARTUNI



UPA2026/142

08.05.2026

Mimi Karlsen

**Nunami aalisakkerivinni innaallagissamut, imermullu akikillileruteqartitseriaatsip atuuttup aallarnisaasunut, suliffeqarfinnullu mikinerusunut atuutsilersinneqarneratigut aningaasatigut, allaffissornikkullu kingunissaanik erseqqissaasumik nalunaarusiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat aningaasalersueriaatsinik, Inatsisartullu aalajangiinissamut tunngavissaannik ataatsimoortumik imaqassaaq. Nassuiaat kingusinnerpaamik 1. januar 2027-mi Inatsisartunut agguanneqassaaq.**

(Inatsisartunut ilaasortaq Napaartog Isak Petrussen, Demokraatit)

Inuit Ataqatigiit pingaartitaraarput immitsinnut pilersorsinnaanissarput, siusinnerusukullu siunnersuuteqartarnitsinni tamanna takuneqarsinnaavoq. Immitsinnut pilersorniarnitsinni sapinngisamik avataaniit nerisassat tikisitavut ikiliniarlugit iliuuserisinnaasagut ugartortuartarpagut.

Imminut pilersorneq inuiaqatigiinni aningaasanik kaaviiartitsissaaq, suliffissaqartitsissaaq aammalu nunatta pissarititai atorluarlugit immitsinnut pilersorutta peqqinnarlunilu pitsaaneruvoq.

Pissusissamisoortutut isigiinnarsinnaanngilarput imeq minguitsoq pigalutigu nuiertarfinni imeq nunanit allaniit pisiarisaratsigu. Imaluunniit saarullit panertut nammineq niuerutigisinnaagualarlugit Islandimiut panertuutaanik pisiortortuarterput. Allamiulli nioqqutissaataat pisariinneruppata akikinnerullutillu patsisaa ugartortariaqarparput, tassanilu siunnersuuteqartup Inatsisartunut ilaasortap Napaartog Isak Petrussen, Demokraatineersup siunnersuutaa Inuit Ataqatigiinniit qujarupparput.

Soorlu siunnersuuteqartup oqaatigigaa aalisakkeriviit nioqqutissiornermut, tunniussinermullu aningaasartuutiviit 50 procentiinik ullumikkut akiliisartut tamannalu aaqqiissut Inuit

Ataqatigiinniit aamma akuersaarparput. Aamma siunnersuuteqartoq isumaqatigaarput oqarmat, aallarnisaasunut aamma suliffeqarfinnut mikinerusunut assingusumik periarfissaqartitsinissamut periarfissat misissussallugit piffissanngortoq. Nukissiutitut aningaasartuutit qaffasissut ullumikkut suliffeqarfinnut aallartittorpassuarnut, suliffeqarfinnullu mikinerusunut akimmiffiupput, allaat aallarnisaallutik suliffeqarfiutitaaqqammersut matusariaqartarlutik. Tamannalu imminut napatitillutalu pilersornerunissatsinnut naapertuutinnngilaq.. Inuussutissarsiutinik assigiinngisitaartitsinissaq eqqartorneqartillugu tamanna pimoorukkutsigu, taava nukissiutitut aningaasartuutit aamma qiviassallugit piumassuseqartariaqarpugut, tamannattaq Inuit Ataqatigiit isumaqatigaarput. Aaqqiissaguttali Nukissiorfiit aningaasaqarneranut ajornerulersitsissannginnissatsinnut eqqarsarluartariaqarpugut, innuttaasunummi akinik qaffaanermik kingunnissaa soqutigisaraarput.

# INUIT ATAQATIGIIT INATSIARTUNI



Nukissiorfiinnaanngillalli suliffeqafiutillit akinik ilungersuaateqarfigisartagaat. Nioqqutissanik assartuineq nunatsinni isorartuumi ilungersunartuuvoq. Qanoq nioqqutissaq, soorlu mattak, Qaanaamiit Nanortalimmut apuutissavarput, akitsorterujussuarnagu? Qanoq naatsiiat akii qaffannagit Qaanaamut apuussinnaavagut? Soorlu salatinik naatsitsisut qanoq nioqqutissatik illoqarfinnut allanut tunisinnaavaat akitsornagit asiutinnagillu? Danmarkimit, Islandimilluunniit nioqqutissanik tikisitsiuarpuqut, qanorli nunatsinni imminut pilersorniarnitsini nioqqutissat akitsortinngikkaluagut apuuttarsinnaavagut.

Imminut pilersorniarnitsinni, Nunattalu pissarititaanik atorluaaniarnitsinni pisisusanut akikillisaataasinnaasunik aammalu nioqqutissiortunut akitsorsaataangitsunik ujartuinissarput pisariaqarpoq – namminermi nerisassaaticut peqqinnarnerulltillu pissarsiarinissai pisariinnerusariaqarput.

Tamakku aamma qulaajarumallugit Naalakkersuisut allannguutissatut siunnersuutaa akueralugu siunnersuut ilalerparput.